

## Uunga

allannguutissatut siunnersuut

**Uunga siunnersuut: Qalerallit avaleraasartuullu avataasiorluni aalisarnermi pisarineqartut akitsuutaat pillugit Inatsisartut inatsisaata allanngortinneqarnera pillugu Inatsisartut inatsisaat nr. x, xXx 2015-imeersoq**

Naalakkersuisut aappassaaneerinissamut saqqumiussaat.

**§ 1-imut**

1. § 1, nr. 2, ima oqaasertaqarpoq:

”2. § 1, imm. 1, ima oqaasertaqarpoq:

”Qalerallit Kalaallit Nunaata oqartussaaffigisaani nunallu allat oqartussaaffigisaanni aalisarneqartut aamma aalisakkat ikerinnarsiortut ilaat Tunumi aalisarnermi aalisarneqartut akitsuutaat inatsimmi matumani aalajangersakkat naapertorlugit akilerneqassapput.”

2. § 1, nr. 3, peerneqarpoq.

3. § 1, nr. 4, ima oqaasertaqarpoq:

”4. § 2 ima oqaasertaqarpoq:

”§ 2. Akitsuummik akiliisussaataaneq piffissami pisarineqarfianni atuutilissaaq, taamaattorli tak. imm. 2.

*Imm. 2.* Sinerissap qanittuani qaleralinniarnermi akitsuummik akiliisussaataaneq piffissami tunitsivimmut tunisassiorfimmulluunniit, matumani aamma umiarsuarmut tunitsivimmut tunisinermi atuutilissaaq.”

4. § 1-imi nr. 01-itut nutaatut ilanngunneqarpoq:

”01. § 3, imm. 1, ima oqaasertaqarpoq:

”§ 3. Suliffeqarfiit aamma inuit avataasiorluni qaleralinniarnissamut pisassinneqarsimasut qaleralinnut kiilumut akitsuut 2,50 kr.-iusoq akilissavaat, taamaattorli tak. imm. 2. Akitsuutip naatsorsornerani ilanngunneqassanngillat pisat ilaat saaniiagassatut tunineqartussat.”

5. § 1, nr. 7, ima oqaasertaqarpoq:

”7. § 3 a-p kingornagut qulequtaq nutaaq ilanngunneqarpoq:

*”Qalerallit sinerissamut qanittumi aalisarnermi pisarineqartut akitsuutaat”*

6. § 1, nr. 8, ima oqaasertaqarpoq:

”8. Qulequttap nutaap kingornagut ilanngunneqarpoq:

”§ 3 b. Suliffeqarfiit aamma inuit § 3, imm. 1-imi pineqartunut ilaanngitsut akitsuut, qalerallit tunitsivimmut tunisassiorfimmulluunniit tuninerisigut isertitamik 5 procentiisut angissusilik akilissa-vaat.

*Imm. 2.* Isertitanik imm. 1-imi taaneqartunik tunniussisup akitsuut tunniussilernermini unerartissavaa. Unerartitsineq pissaaq unerartitsisussaatitaasup aningaasanik unerartinneqartussanik naatsorsu-neratigut, aningaasallu isertitanit ilanngaatinerisigut.”

7. § 1-imi nr. 02-tut nutaatut ilanngunneqarpoq:

”02. § 4, imm. 2 aamma 3, ima oqaasertaqarput:

”*Imm. 2.* Suliffeqarfiit aamma inuit akitsuummik akiliisussaatitaasut § 3, imm. 1-imi aamma § 3 a-mi taaneqartut akitsuutip naatsorsornissaanut akitsuutillu eqqortumik akilerneqarnissaanik nakku-tilliinissamut tunngavigineqarsinnaasunik naatsorsuusiussapput.

*Imm. 3.* Suliffeqarfiit aamma inuit akitsuummik akiliisussaatitaasut § 3, imm. 1-imi aamma § 3 a-mi taaneqartut akitsuusigassat taakkualu akitsuutitaat piffissap akitsuusiiffiusup qaangiunnerani, kingusinnerpaamillu piffissap akitsuusiiffiusup qaangiunnerata kingorna qaammammi ulluinnarmi kingullermi akileraaruseriffimmut nalunaarutigalugillu akilissavaat.”

8. §1-imi nr. 03-tut nutaatut ilanngunneqarpoq:

”03. § 4 a-tut nutaatut ilanngunneqarpoq:

”§ 4 a. Suliffeqarfiit unerartitsisussaatitaasut § 3 b, imm. 2-mi taaneqartut suliffeqarfiit aamma inuit qaleralinnik tunisisartut, isertitat tunniunneqartut, bonusit il.il. paasissutissallu allat pillugit naatsorsuusiussapput, akitsuutip naatsorsornissaanut akitsuutillu eqqortumik akilerneqarnissaanut tunngaviusinnaasunik.

*Imm. 2.* Suliffeqarfiit aamma inuit unerartitsisussaatitaasut § 3 b, imm. 2-mi taaneqartut tunitsivinnut tunisassiorfinnulluunniit ataasiakkaanut tunngatillugu tunisat akitsuusigassat amerlassusii, pissarsiat tunniunneqartut amerlassusii taakkualu akitsuutitaat piffissap akitsuusiiffiusup qaangiunnerani, kingusinnerpaamillu piffissap akitsuusiiffiusup qaangiunnerata kingorna qaammammi ulluinnarmi kingullermi akileraaruseriffimmut nalunaarutigalugillu akilissavaat.

*Imm. 3.* Nalunaarut piffissaagallartillugu nassiunneqanngippat akiliisitsissut piffissamut akitsuummik akiliiffissamut akitsuutip 2 procentiinik angissuseqartoq, minnerpaamilli 500 kr.-iusoq annerpaamillu 5.000 kr.-iusoq akilerneqassaaq.”

9. § 1, nr. 12, ima oqaasertaqarpoq:

”12. § 8, imm. 1, ima oqaasertaqarpoq:

”§ 8. § 1, imm. 1-imik, § 3, imm. 1-imik, § 3 a, imm. 1-imik, § 3 b-mik, § 4, imm. 2-mik 3-milluunniit, § 4 a, imm. 1-imik 2-millu piaaraluneerluni mianersuaalliorujussuarluniluunniit unioqqutitsineq, imaluunniit akiliinissamut piffissaliussamit sivikinnerusumik piffissaqarluni akiliinissamik qularnaveequsiinissamilluunniit § 5 naapertorlugu peqquneqarnermik malinninnginneq Kalaallit

Nunaanni pinerluttulerinermik inatsimmi maleruagassat naapertorlugit pineqaatissiinermik kinguneqarsinnaavoq.”

## **Inatsisissatut siunnersuummut oqaaseqaatit**

### **Oqaaseqaatit nalinginnaasut**

Allannguutissatut siunnersuut qalerallit immannguaannaq suliat suliarineqanngitsulluunniit annissu-  
inermi akitsuutaat pillugu siunnersuummut isornartorsiutaasut akuersaarlugit saqqumiunneqarpoq.  
Allannguutip kingunerissavaa inatsisissatut siunnersuutip tassunga tunngasortaata peerneqarnissaa.

Taarsiullugu siunnersuutigineqarpoq nunami tamarmi sinerissap qanittuani qaleralinniarluni aalisar-  
nerup isumalluutinik atuineri akiliummik akitsuuserneqartalernissaa.

Sinerissap qanittuani qaleralinniarnermi akitsuutip tunisinermi isertitat 5 procentiannik angissuse-  
qarnissaa siunnersuutaavoq. Taamaaliornikkut tunitsiviit tunisassiorfiillu assigiinngitsut tunisinermi  
akinik assigiinngitsunik akeqartitsisinnaanerit eqqarsaatigineqarpoq. Procentiliinerup kingunerissa-  
vaa akitsuutip tunisinermi akinut sanilliullugu annikitsuinnaanera, tunisinermi akigititat angissusii  
apequtaatinnagit.

Akitsuummik akiliisussaaneq qalerallit tunitsivimmut tunisassiorfimmulluunniit tunineqarneranni  
atuutilissaaq. Akitsuut qaleralinnik tunisisup akiligassaraa. Kisianni tunitsivik tunisassiorfilluunniit  
tassaavoq tunisisup isertitassaanit akitsuummik unerartitsisussaataasooq, akitsuummillu unerartin-  
neqartumik akileraaruseriffimmut akiliisussaataasooq.

Tunisisup akitsuut aningaasarsiami akileraaruteqaataasussat naatsorsorneranni ilanngaatigisinnaa-  
vaa.

Sinerissap qanittuani qaleralinniarnermi pisat tunineqarneranni akitsuusersuinissamik siunnersuutip  
kingunerisaanik siunnersuutigineqarpoq avataasiorluni qaleralinniarnermik akitsuusersuineq allan-  
ngortinneqassasoq. Allannguutip kingunerissavaa avataasiorlutik qaleralinniat pisaminnit tamanit  
akitsuut akilertalissammassuk, taamaallaat avataasiorlutik aalisartut pisaasa ilaat saaniiagassatut tu-  
laanneqartussaataasut pinnagit.

Avataasiorluni aalisarnerup akitsuusiiffigineqarnerata pisat ilaannik tulaanneqartussaasunik ilane-  
qarneranut taarsiullugu akitsuutip angissusia appartinneqassaaq, avataasiorluni aalisarnerup akitsu-  
titigit nammackersugaanera ataatsimut isigalugu allangortussaajunnaarlugu. § 3, imm. 1-imi  
atuuttumi akitsuut 2,50 kr.-inik angissusiligaavoq. § 3, imm. 2 naapertorlugu aaqqiissutip kingune-  
raa akitsuut kingulleq atorneqartoq tassaammat 3,06 kr.-it. Siunnersuutigineqarpoq akitsuut inatsi-  
sip atortuulerfia aallarnerfigalugu 2,50 kr.-inut angissusilerneqassasoq. Avataasiorlutik aalisartut  
akitsuutitigit nammackersugaanerat taamaalilluni ullumikkutut iinnassaaq. Avataasiorluni aalisar-

nermut tamarmut akitsuutip angissusissaata akitsuutip angissusia § 3, imm. 1-imi allassimasoq angeqqatigimmagu tamanna nalaatsornerinnaavoq. Akitsuutip angissusia nutaaq 2016-imi kvartalit aappaat aallarnerfigalugu § 3, imm. 2-mi aalajangersagaq naapertorlugu aaqinneqartassaaq.

Sinerissap qanittuani qaleralinniarnemit 2016-imi akitsuutitigut isertinneqartussat 20 mio. kr.-it missaanniinissaat eqqoriarneqarpoq. Isertitassat angeqqatigaat qalerallit immannguaannaq suliat suliarineqanngitsulluunniit annissorneranni akitsuutikkut isertinneqartussat. Allatut oqaatigalugu, allannguutissatut siunnersuut isertitassanut sunniuteqartussaangilaq.

Allannguut umiarsuaatileqatigiiffiit kiisalu tunitsiviit tunisassiorfiillu akitsuutit naatsorsornissaanut akilernissaannullu allaffissornissaannik kinguneqassaaq.

Angallatini inuttat aalisarnermi pisat naapertorlugit akissarsisinneqartarpat, akitsuullu akissarsiasat tamarmiusut inuttanut tunniunneqannginneranni ilanngaatigineqassappat, siunnersuut taakununga sunniuteqassaaq.

### **Aalajangersakkanut ataasiakkaanut oqaaseqaatit**

*Nr. 1-imut (inatsimmi § 1, imm. 1)*

Inatsisip atuuffiata suliffeqarfinnik inunnillu aalisakkat ikerinnarsiortut ilaannik, matumani aamma ammassassuarnik ammassanillu Tunumi aalisarnissamut pisassinneqarsimasunik ilaneqarnissaa siunnersuutaavoq.

Aammattaaq atuuffianut ilanngunneqarput sinerissap qanittuani qaleralinniarnermi pisat tunitsivinnut tunisassiorfinnullu tunineqartut. Maannamutuut pineqartunut ilaapput suliffeqarfiit inuillu avataasiorluni qaleralinniarnissamut avaleraasartooriarnissamullu pisassinneqarsimasut.

*Nr. 2-mut (inatsisissatut siunnersuummi nr. 3)*

Inatsisissatut siunnersuummi § 3-p peerneqarnissaa siunnersuutaavoq, qalerallimmi immannguaannaq suliat suliarineqanngitsullu annissornerini akitsuut peerneqarmat, sinerissallu qanittuani qaleralinniarnermi akitsuummik taarserneqarluni.

*Nr. 3-mut (inatsimmi § 2)*

Avataasiorluni qaleralinniarnermi aamma aalisakkat ikerinnarsiortut ilaannik Tunumi aalisarnermi akitsuummik akiliisussaatitaaneq piffissami pisarineqarfianni atuutilissaaq.

Imm. 2-mi aalajangersakkap kinguneraa sinerissamut qanittumi qaleralinniarnermi akitsuummik akiliisussaatitaanerup piffissami pisat tunineqarfianni atuutilernissaa.

*Nr. 4 (inatsimmi § 3, imm. 1)*

Aalajangersakkap kinguneraa avataasiorluni qalerallinniarnermi pisat akitsuutaannik appaaneq. Tassunga taarsiullugu pisat ilaat tunitsivinnut tunisassiorfinnulluunniit tulaanneqartussat akitsuusigas-sanut ilanngunneqarput, tassa pisat ilaat saaniigassatut tunineqartussat pinnagit. Umiarsuit tunitsiviit matumani tunitsivittut tunisassiorfittulluunniit isigineqarput.

Pisassiinermi pisat qanoq amerlatigisut pisalluunniit ilaat qanoq amerlatigisut saaniigassatut tulaanneqartussaataitanerannik aalajangersaasoqarsimangippat akitsuut pisanit pisat allatorneqarfianni nalunaarsorneqartunit tamarmiusunit naatsorsorneqassaaq.

*Nr. 5-imut (qulequtaq nutaaq)*

Aalajangersagaq aaqqiinermik pissuteqarpoq, tamannami inatsisip atuuffiata sinerissap qanittuani qalerallinniarnermik ilaneqarnerata kingunerisaanik qulequttamik nutaamik ilanngussinerummat.

*Nr. 6-imut (inatsimmi § 3b)*

Sinerissap qanittuani qalerallinniarnerup isumalluutinik atuinermi akiliummik akitsuusiiffigineqartarlernissaa siunnersuutaavoq.

Akitsuut sinerissamut qanittumi qalerallinniarnermi pisarineqartut tunitsivinnut tunisassiorfinnulluunniit tunineranni isertitat 5 procentiinik angissuseqarpoq.

Isertitatut isigineqassapput aningaasat, pigisat assigisaalluunniit tunisanut taarsiullugit tiguneqartut. Isertitanuttaaq ilaapput soorlu bonusitut tunniunneqartut, tunissutit, suut aningaasaanngitsut, akikililiissutit assigisaalluunniit, tunisisup qalerallinnik tunisinermini taartitut tigusai.

Kalaaliaqqanut (kalaalimineerniarfinnut), suliffeqarfinnut, kantiinanut, neriniartarfinnut il.il. tunisineq tunitsivinnut tunisassiorfinnulluunniit tunisinertut isigineqanngilaq.

Imm. 2-mi aalajangersakkami aalajangersarneqarpoq tunitsivik tunisassiorfilluunniit tassaammat isertitassat tunniunneqalerneranni akitsuummik unerartitsisussaataasooq. Unerartitsineq pissaq unerartitsisussaataasup aningaasanik unerartinneqartussanik naatsorsuillunilu isertitassanit ilanngaatiginninneratigut.

*Nr. 7-imut (inatsimmi § 4, imm. 2-3)*

Inatsisip atuuffiata aalisakkat ikerinnarsiortut ilaannik Tunumi aalisarneqartunik ilaneqarnera allannguummut pissutaaneruvoq.

Aalajangersakkami aalajangersarneqarpoq, suliffeqarfiit inuillu avataasiorluni qaleralinniarnissamut kiisalu aalisakkat ikerinnarsiortut ilaannik Tunumi aalisarnissamut pisassinneqarsimasut akitsuut pillugu naatsorsuusiortussaataitaallutillu nalunaarutiginnittussaataitasut. Kiisalu akitsuutip piffissaa-gallartillugu akilerneqarfissaa aalajangersarneqarpoq.

Aammattaaq akitsuutit pillugit nalunaarsuiffiit akiligassat allagartaasa il.il. assilineqarnerannik ilaqartinneqarnissaannik piunasaqaat atorunnaarsinneqarpoq, paasissutissammi tamakku akitsuutit naatsorsornissaanni pisariaqanngillat.

*Nr. 8-mut (§ 4 a nutaaq)*

Aalajangersakkami aalajangersarneqarpoq suliffeqarfiit qaleralinnik sinerissap qanittuani aalisarnermi pisarineqarsimasunik tunisisoqartillugu isertitassanik tunniussisussat, tunitsivinnut tunissasiortinnulluunniit ataasiakkaanut tunngatillugu naatsorsuusiortussaataitasut, akitsuutip naatsorsornissaanut aammalu akitsuutip akilerneqarnerata nakkutiginnissaanut tunngaviusinnaasunik.

Tassungalu ilutigitillugu aalajangersakkami allanneqarpoq akitsuutip nalunaarutigineqarnissaanut akilerneqarnissaanullu piffissaliussaq. Akitsuummik akiliisussaataitasup nalunaarut piffissaagallartillugu nassiutinngippagu akiliisitsissut akitsuutip 2 procentiinik angissuseqartoq, minnerpaamilli 500 kr.-iusoq annerpaamillu 5.000 kr.-iusoq akilerneqassaaq.

*Nr. 9-imut (inatsimmi § 8, imm. 1)*

Inatsisip atuuffiata ilaneqarnerata kingunerisaanik siunnersuutigineqarpoq aalajangersagaq allanngortinneqassasoq, aalajangersakkanik nutaanik unioqqutitsisoqassagaluarpat pineqaatissiisoqarsinnaaqullugu.